

XI.

11

Q. D. B. V.

DE

# SENECA MEDICO

ID EST

DE QVIBVSDAM VTRIVSQUE  
SENECAE SENTENTIIS MEDICIS

*DISPVATIO SECVNDA*

QVAM

*PRAESIDE*

IO. IACOBO KIRSTENIO

MED. DOCT. PHYSIOL. ET CHEM.

PROF. PVBL. ORD. MED. H. T. DECANO

*IN CYCLO ACADEMICO*

PLACIDAE PHILIATRORVM DISQVISITIONI

EXPONIT

GVSTAVVS GEORGIVS ZELTNER


ALTORFINVS


A. D. XV. NOV. A. S. R. c1o1cccxxxviii.

---

*ALTORFII*

TYPIS IOH. GEORGII MEYERI VNIV. TYPOGR.





I.

SENECA, *de Consolat. ad Heluiam matrem.* (a)

Cap. I.

In morbis nihil est perniciosius, quam  
immatura medicina.



I qua est sententia, quae medicinam facien-  
tibus salutarem promittit effectum, certe  
haec est, dum SENECA noster opportuni-  
tatem in medendo studiosissime esse obser-  
uandam uerbis cedro dignis indicat. SE-  
NECA tunc in Corsicam a Claudio Impe-  
ratore relegatus, matrem, isto filii exilio moestam, consolari  
parabat. Cui moestitiae se non statim; dum ea recens fae-  
uierit, occurrisse ait, ne eandem ipsis solatiis magis irritaret.  
Rationem huius consilii arcessit ab arte salutari, quae  
docet, *in morbis quoque nihil esse perniciosius, quam immatu-  
ram medicinam.* Qua similitudine in simili argumento etiam  
usus est PLUTARCHVS, ille uniuersae eruditionis promus  
condus non immerito a nonnullis appellatus. *De consolatio-  
ne enim ad Apollonium, pag. 101.* haec scribit: 'Οὐδὲ γὰρ εἰ  
βέλτιστοι τῶν ἰατρῶν πρὸς τὰς ἀθροίας τῶν ρευμάτων ἐπιφορὰς  
εὐθὺς προσφέρουσι τὰς διὰ τῶν φαρμάκων βοηθίας, ἀλλ' ἐῴσι  
τὸ βαρὺν φλεγμονῆς, διὰ τῆς τῶν ἔξωθεν ἐπιχειρῶν ἐπιθέ-  
σεως αὐτὸ δι' αὐτῆς λαθεῖν πέψι. h. e. Peritissimi etiam me-  
dici, confertim ingruentibus uitiosorum humorum fluxionibus,  
non statim medicamenta applicant; sed tumorem inde ortum  
A 2 patiun-

(a) Haec in quibusdam editionibus dicitur *Albina*.

*patiuntur, foris illitis remediis, ipsum ultro concoctione quadam emolliri.* Medicinam uero hoc SENECAE loco nihil aliud significare, quam *medicamentum*, uel remedium; id sententiae ratio declarat; quo nomine etiam CICERO (b) et OVIDIVS (c) alique, saepius *medicamina* uocare soliti sunt: Sic et *immaturum*, perhibente CALEPINO, (d) idem interdum est, quod *intempestium*, *inconsideratum*, et *praeceptum*. Scilicet, non eousque medicina est differenda, (quod nonnulli Stahlianæ disciplinæ decretis abusi putant,) dum ipsa anima succurrat aegrotanti, et quasi remedium afferat; sed omni tamen studio opportunum tempus potissimum ad sanandum est eligendum, nihilque aegris, nisi iusto tempore, est porrigendum, secundum illud Poëtae:

*Temporibus medicina ualet; data tempore profunt;*

*Et data non apto tempore, uina nocent.*

Sed neque necesse est, ut Medicus adeo studiose secundum TREVVIVM, (e) COLLIMITIVM, (f) HIEBNERVM, (g) et alios innumeros, Astrologicas temporum mutationes obseruet; etsi quaedam ex illis haud plane uilipendendae (h). Potius sibi curae habeat, ut inprimis quatuor anni temporum uices animaduertat; cum experientia, fidelissima rerum magistra, doceat, omnino uarios morbos maiori facilitate sanari uere, quam hieme. Id quod, praeter HIPPOCRATEM et GALENVM, CELSVS, (i) latinorum Hippocrates, dudum praecepit. Duo, inquit, genera curationum sunt: alia in quibus eligere tempus non licet; sed utendum est eo, quod incidit; sicut in uulneribus, et fistulis. Alia, in quibus nullus dies urget, et expectare tutissimum, et facile est; sicut euenit

(b) Ad Attic. Lib. XVI. (c) I. de Pont. Eleg. II. (d) Dictionar. undecim linguar. sub uoce immaturum. (e) Astrolog. medic. (f) Artific. de Applicat. Astrolog. ad medicin. (g) Myster. Sigillor. herbar. et lapid. (h) vide IO. IAC. WALDSCHMIDII Dissertat. de Medico-Astrolog. (i) De Medicin. Lib. VII. cap. 7.

*in iis, quae tarde increscunt, et dolore non cruciant. In his uer expectandum est: at si quid magis pressit, melior tamen autumnus, quam hiems, uel aestas est; atque is ipse medius, iam fractis aestibus, et nondum ortis frigoribus.* Ita et *matutini*, et *uestertini* temporis rationem esse habendam in porrigendo cibo, idem auctor *Lib. III. cap. 4.* multis uerbis edocet. Maximam uero attentionem merentur, uulgo dicta *uniuersalia morborum tempora*; quorum, secundum ARCHIGENEM (k) duo saltem, status et declinatio; secundum sectam uero methodicam, (l) et GALENUM (m) *quatuor*: principium, incrementum, status et declinatio, numerantur. Aliud namque agendum est ab initio morbi, aliud in statu, aliud in fine. Sic uomitoria, quamdiu materia morbifica, seu peccans, est in primis uis, imminentem, aut iam praesentem febrem, aliaque incommoda, non raro cito et feliciter remouerunt, aut saltem sanationem reddiderunt faciliorem. Ita quoque uenaesectio, in principio administrata, saepius pleuritide laborantes, nisi sanauerit, attamen ad feliciorum curationem multum contulit. Ast perquam tristes etiam effectus illi aliquando experti sunt, in quibus haec praesidia immaturo tempore fuere adhibita; quos recensere superuacaneum esset; cum PERSIVS (n) iam cecinerit:

*Helleborum frustra, cum iam cutis aegra tumebit,*

*Poscentes uideas; uenienti occurrere morbo.*

Optime igitur illi sibi, aegrotantibusque, consulere solent, qui semper in animo suo agitant prudentissimas uirorum in arte salutari uersatissimorum regulas, atque praecepta, et, prout circumstantiae admittunt, leniora fortioribus praemittunt remedia; dies, et maxime criticos, observant, ne *immaturo medicina* salutarem impediunt crisin; insimulque ad

A 3

uires

(k) GALENVS de Morbor. tempor. cap. II. (l) BARCKHUSEN de Origin. et progress. medicin. Dissert. IX. §. 3. (m) GALENVS loco cit. (n) Satyr. III.

uires respiciant; nec moueant, materia quam sit mobilis; studiosissimeque attendant ad id *tempus*, quando sit mitigandum, roborandum, euacuandum, et quae huius generis sunt alia. Cuiusmodi salutaria monita Parens omnis Medicinae, HIPPOCRATES, passim in scriptis suis fidelissime annotauit, et posteritati reliquit. Id quod ex recentioribus, praeter IO. PAVL. GALLVCIVM, (o) Germaniae nostrae Hippocrates, FRID. HOFFMANNVS (p) in legibus suis, tanto legislatore dignis, et praecipue in lege prima, repetiit, et commendauit. Omnibus, inquit, *in morbis ordinem et successum actuum motuumque spontaneorum, immo ipsa tempora, quibus natura sola medelam in salutem aegrotantium molitur, atque absoluit, curate et perquam solícite obseruare decet.* Explicationi huius legis hunc finem imponit: *Quum praeparationis negotium non nisi certo temporis spatio absolui possit, utique maxime omnium tempus expectet, nec cursum praecipitet medicus, necesse est: quae certe prudens expectatio in Medicina summum est arcanum.* Qua occasione uenerabilis ille senex, praeter GIDIONIS HARVAEI libellum *de morbis expectatione curandis*, propriam suam dissertationem *de curatione morborum in tempore* non immerito commendat; siquidem haec disputatio ad hanc SENECAE sententiam ad instar commentarii esse potest. Cui etiam alteram, pari commendatione dignam, ab eodem auctore addo: *de prudenti medicamentorum in tempore applicatione.* (q) Probe igitur sunt tenenda, quae sapientissimus omnium mortalium, SALOMO, (r) dixit: *Cuique sua est tempestas: - - - tempus occidendi; et tempus curandi.*

II. SENE-

(o) De tempor. ad medend. accommodat. (p) Medicin. ration. System. Tom. III. Sect. II. cap. 2. p. 421. (q) Respond. HVSZTI Halse 1695. edit. (r) Ecclesiast. cap. III. v. 1. et 2.

II.

-non supponit SENECA, *Epistol. CXXIV.*

**Nullam habet spem salutis aeger,  
quem ad intemperantiam medicus  
hortatur.**

**D** Ari aliquando aegros, qui, cum summa intemperie partium corporis laborent, nihilominus tamen intemperate uiuant, nulli insolens erit, et inauditum. Quid enim tristius uulgatiusque illo nonnullorum dictorio: *Ich esse/ was mir schmedt; und leide/ was ich muß.* Hi uero non raro ipsimet sibi spem salutis praecidere solent, dum, neglecto medici consilio, suis solummodo uoluptatibus indulgent, etsi illis interdum fortuna, licet rarius, faueat, ne intereant. Id quod suo iam aetate primus Academicæ Sectæ fundator, PLATO, (s) animaduertit, quem ita latine loquentem fecit SERRANVS: *Dicis, inquit, hos perinde uicturos, ac illos, qui, licet aegrotent, nolint tamen, propter intemperantiam, extricare se atque expedire e uitiosa uiuendi ratione. Omnino, inquit. Atqui, inquam, scite quidem illi et dedita opera uidentur causam quaerere, cur in morbis suis pergant. Dum enim curantur, nihil aliud perficiunt profecto, quam ut et morbos adaugeant, et magis magisque implicent, atque inuoluant: et tamen eam spem retineant, futurum, ut cuiuslibet medicamenti beneficio, sani et incolumes euadant. Omnino huiusmodi affectiones in aegrotos cadunt. Quid uero? nonne illud indecorum est atque importunum, quod ipsis maxime is sit odiosus, qui uera moneat? dum uidelicet dicitur, non potiones, non unctiones, non incisiones, non incantationes, non amuleta, non alias denique res quaspiam, profuturas, priusquam ille desinat,*

et

*et ebrietati, et gulae, et ueneri, et inertiae, se dare. Verum enim uero, quis est, qui putaret, inter medicos quoque nonnullos reperiri ita peruersos, qui ipsimet aegros ad intemperantiam non nunquam adhortentur? cum tamen intemperantia fons atque scaturigo plurimorum morborum merito dicatur. Vnde etiam HIPPOCRATES (t) id ipsum rationi aduersari docet. Magis, inquit, rationi consentaneum, aegros non posse imperatis obsequi, quam medicos ea, quae, minime conueniant, imperare. Satis tamen iustam, prohi, habuit causam SENECA noster, cur fidelissime, et aegros et medicos admoneret, et ab ineptis, quae ad intemperantiam spectant, consiliis abstineant, ni omnem salutis recuperandae spem insimul amittere uelint. Sunt nempe, quemadmodum in omni mortalium genere, ita etiam ex medicis nonnulli, quos turpe quaestus faciendi studium aliquando impellit, ut, perhibente GALENO, (u) aegrotantium cupidini promptius obsequantur, quo plus lucri hinc faciant. Huius farinae medici haud iniuste a magni nominis quondam Viro, GEORG. FRANCO, (x) in monstroforum classem referuntur. Talis, inquit, monstrosus medicus est ille, qui praemeditatus, et ex consilio, solerter ac speciose clientes suos circumuenit, turpioris lucelli gratia conscientiam onerat, male consulendo proximi salutem. Alii ideo obsequuntur desiderio et intemperantiae aegrotantium, ut horum fauorem eo facilius aucupentur. Vnde GALENVS (y) iam conquestus est, esse nonnullos, qui, ubi aegrotare coeperint, medicos sibi accersant, non optimos; sed qui maxime adulari didicerint, qui etiam frigidam daturi sint, si quis postulet; laxaturi, si quis iubeat; et uinum sollicitantibus porrecturi, imo seruorum ritu iussis obtemperaturi. Sed dici non potest, quantum eiusmodi indulgentia, item et intempestius*

(t) Lib. de Arte, edit. Foëtan. p. 4. (u) VI. Epidem. com. IV. t. 8. (x) Dissert. de medic. monstros. Resp. COTTA Heidelberg. 1677. pag. 5. (y) Lib. I. de curat. morbor.



medici misericordia, ac multo magis turpis adulatio, noceant hominibus cum aduersa ualitudine conflitantibus. Grauis-  
sime autem omnium huius farinae medici tum peccant, cum  
sub praetextu felicioris sanationis, grauibz uitiis et peccatis  
committendis ansam suppeditant; immo et aegros adhor-  
tantur. O utinam non inuenirentur eorum exempla, quā  
aliquando *fornicationem*, et *ebrietatem*, grauissima illa pecca-  
torum genera remediorum loco commendarunt! Haud ita  
diu uero, studiosus aliunde huc delatus me conuenit, mihi-  
que narrauit, se aliquando uehementer uexatum fuisse pollu-  
tionibus nocturnis, et a Medico haud uulgari, eapropter  
petiisse consilium, quomodo ab hoc malo liberari possit? Is  
haud cunctatus respondit, uix praesentius esse remedium,  
quā si res habeatur cum femina; hac quidem inepta et impia  
limitatione, se ei hoc consilium suppeditare, non tanquam mo-  
rum magistrum, sed ut medicum. Iuuenis uero, cum haud  
improba mente praeditus esset, hoc responso uelut obstupe-  
factus, maluit eo morbo laborare, quam graue peccatum  
sciens committere. Sicuti uero mirum est, (si quidem eius-  
modi narrationi fides habenda,) inter christianos reperiri  
tam irreligiosos imprudentesque Medicos, qui non solum  
eiusmodi consiliis salutarem infament artem, et ipsi suam one-  
rent conscientiam; sed et aliis patentissimum peccandi cam-  
pum, quantum in se est, aperiant: ita tantum abest, ut de-  
testabile hoc remedii genus reuera prosit, ut multo potius  
noceat. Cum eius usu, atonia uesicularum seminalium, quae  
plerumque in causa huius mali est, magis magisque induca-  
tur, et augeatur; quin immo ad multa alia peiora et pericu-  
losiora symptomata uia sternatur. Melius igitur et animae  
et corpori consulunt, qui ab his auxiliorum generibus cala-  
mitosis plane abstinent, et potius eorum sequuntur exempla,  
quae THEODOR. ZWINGERVS (z) collegit, ac imprimis ex

B

POLY-

POLYDORI *lib. 1. cap. 3*, proposuit, ubi relatum legitur de THOMA II, Eboracensi Episcopo, cui aegrotanti medici consulere, ut feminae pro remedio misceretur, et amici idem uehementer urgerent, ipseque assentiri uideretur. Adducta post decentis formae femina, idem tamen noluit eam attingere. Ab amicis reprehensus, respondit: *propter salutem carnis tandem moriturae, immortale decus pudicitiae non amit- tam.* Praeterea autem omnino etiam nonnulli ex medicis fuerunt, qui aliquando, uel *largiorem uini potationem*, uel ipsam *ebrietatem*, commendarint, inducti fortassis a Medicis Salernitanis, canentibus: (a)

*Si nocturna tibi noceat potatio uini,*

*Hoc tu mane bibas iterum, et fuerit medicina.*

Quae uero sententia cum grano salis est accipienda, ne illud tandem eueniat, quod alicui morioni aulico uenit in mentem, cuius meminit IVL. VVILH. ZINCGRÉFVS. (b) Sic uero RHASES, AVICENNA, IACOBVS SYLVIVS, semel in mense crapulam ad sanitatem conferre, docuerunt. (c) Nec ualet ingeniosa excusatio IAC. PRIMEROSII. (d) Is enim cum in HIPPOCRATE et PAVLO AEGINETA quaedam loca inuenisse, sibi uisus est, ubi hi largiorem uini potationem commendauerint, ad uarios debellandos morbos: *Verum hic temulentiam non commendo*, inquit, *quae si sequatur, id erit per accidens ob uariam naturam sumentis.* Si enim duobus aegris eodem morbo laborantibus amphoram uini Medicus praescribit, unus forsan ebrius fiet, alter minime: nam ebrietas sequitur per accidens ratione Medici: cum inter homines quidam uno aut altero haustu inebrientur; alii uero non nisi pluribus repetitis. Ebrietatem igitur Medicus non imperat, quamuis uini liberaliorem potum interdum suadeat. Demum qui

(a) Medicin. Salernitan. Cap. XV. (b) in der Teutschen Apophthegmat. p. 378.

(c) Vid. PETR. MEXIA in sylv. uariar. lection. Part. III. cap. 17. (d)

De errorib. uulg. Lib. III cap. 18.



*non animo peccandi, nec uoluptatis, sed sanitatis tantum causa, eiusmodi remedio utitur, uix peccatum admisisse uidetur.* SENECAE uero nostri sententiam illustrant et defendunt par illustre HOFFMANNIORVM; CASPARVS (e) nimirum, nostrum quondam decus, et FRIDERICVS f) Hallensium ornamen-  
tum. Hic, *ex omnibus maxime inquit, debet Medicus colere temperantiam: ut enim intemperantia medicinae mater fuisse dicitur: ita temperantia medicinae filia est. Quam qui dextre colit, eum auctoritate aliis persuadere eandem potest.* Alter, sententia HIPPOCRATIS usus: *multi corrumpunt corpus suum, inquit, et quod DEVS dedit aptum, faciunt ineptum, idque labefactant, otio, somnolentia, uino, uigiliis, uenere, ac immodica libidine.* Felix igitur is est, qui medico temperanti se tradit: ille enim non potest non etiam omnia, quae ad temperantiam spectant, ordinare, sicque salutis spem magis confirmare ac corroborare, quam aliis adimere.

## III.

SENECA, *Epistol. CIV.*

## Peregrinatio non facit Medicum.

QVi saltem fugitiuo, ut aiunt, oculo hanc intuentur sententiam, sane putent, SENECAE cum medicis plane non conuenire: utpote qui peregrinationes non solum magnopere commendant, uerum etiam ipsi ut plurimum itinera in longe distitas regiones, artis medicae amplificandae gratia, instituerunt. Nisi enim peregrinationes facerent, aut certe perficerent, medicum; cur et ueteres, et recentiores medici, ita frequentes suscepissent peregrinationes? Quorum inter ueteres praecipue nominandi, HIPPOCRATES, DIOSCORIDES,

(e) Isagog. medic. orat. de offic. medic. p. m. 80. (f) Dissertat. Medicus sui ipsius,

GALENVS, PAVLVS AEGINETA, alijque; ex recentioribus, charta et tempus mihi deficerent, si uel plurimos saltem indicare uellem, qui ad alias, et non raro ad permultas orbis terrarum regiones excurrerunt. Vnum saltem ex hoc aeuo dominare sufficiat, Celeberr. ENGELBERT. KAEMPFERVM, qui fere totam, quanta est, Asiam, permigravit; (g) cui ea propter etiam, et Historici, et Philologi, et inprimis Medici, plurimum debent. Quam egregie etiam iter facientibus medicis prospexerunt Viri clarissimi, BARTHOLINVS, WIGANDVS, HAFFENREFFERVS, GRILLVS, et alii: utpote qui, editis singularibus operibus satis abunde commonstrant, non solum, quod medico itinera maxime sint necessaria; uerum etiam, quo Philater quisque modo ueram utilitatem ex itineribus capere possit? Et qui uel obiter saltem secum perpendit, quod non quacuis terra omnes ferat, atque, artes; et quod HIPPOCRATES medicinam discantibus *locum studiis aptum* (h) inter alia commendat: is experietur, haud facile etiam unicam urbem, immo regionem, sufficere ei, qui Florae deliciis animum oblectaturus, herbarum naturam, cognitionemque, scrutari cupit. Ille enim quam maxime necesse habet, ut ad externos etiam, eosque uarios, se conuertat hortos et campos. Et, qui remediorum uarietatem atque abundantiam cognoscere auet, uix satiari poterit, nisi ea in magna quantitate ipse contempletur in aliis regionibus, et inprimis apud Belgas, et Britannos, ubi copia et complexus earum rerum inuenitur uberrimus. Sic etiam cultorem artis spagyricae haud poenitebit, ad exemplum nuper defuncti clarissimi et exercitissimi, CASPAR. NEVMANNI, (i) uariarum Chemicorum officinas, seu *Laboratoria*, perlustrare, in quibus inueniet, furnorum, instrumentorum, aliorumque

---

(g) Vid. Praefat. Amoenitat. exoticar. ab eo edit. (h) Vid. Hippocrat. in lege.

(i) Vid. eius *Lection. chymic. de salib. alkal. fix. et Camphor. in fine.*

que uasorum , insignem copiam et uarietatem , quibus artifex eo commodius operationes suas perficere atque absoluerè possit : inter quae sane praecipue admiratus sum *Laboratorium* Aesculapii Belgici , HERMAN. BOERHAAVII , qui nunc demum , pro dolor , in magnum orbis litterati detrimentum , e uiuis discessit. Quid dicam de illis , qui anatomes studium excolunt , quibus inprimis Gallia , foecundissima artium mater , fauet , et largissimam in secandis cadaueribus humanis sese exercendi occasionem offert. Taceo illud omni admiratione maius DE NOÛES inuentum artificium , statuarum nimirum ex cera confectarum , et naturae simillimarum , quae Lutetiae asseruantur , spectatu omnino dignissimae ; cum non solum cum praeparatis naturalibus Ruyschianis omnino conueniant ; sed ita instructae apparataeque sint , ut etiam Medici et Anatomici exercitissimi oculatissimique , u. gr. GALERATVS , BACHOQVIVS , et SYLVESTER , uelut uisu decepti , pro naturalibus eas habuerint ; quarum prolixiorè descriptionem , una cum commendatione peregrinationis ad Gallos exhibet Doctissimus DANIEL HOFFMANNVS. (k) Porro inter peregrinandum obseruantur , uariorum populorum diuersae consuetudines , uictus rationes , mutationes coeli , tempestatum , et aeris , ac quae sunt alia innumera , medico , ut experiatur , perscruteturque , necessaria. Ex omnibus autem , et quod primo loco ponendum fuisset , conuersatio cum uariis in arte salutari uersatissimis Viris , ad iter faciendum Philiatros allicere poterit , ex quorum sermonibus et colloquiis nemo non plurimam sibi polliceri potest utilitatem. Quibus addo aliquando etiam e re medici peregrinantis fore ; si is familiares quoque sibi reddat pharmacopoeos , ut permittant intrare ipsorum officinas , in quibus non solum interdum ra-

B 3 . riora ,

(k) Vid. eius Dissertac. epistol. de utilitat. peregrinat. Gallican.

riora, quae ipsi afferuant, cerni; uerum etiam formulae uariorum medicorum lustrari, possunt. Expertus loquor, siquidem etiam post obitum adhuc publice praedico, insignem fauorem IO. FRID. GUNTHERI DE STERNEGG, Sacrae Caesareae Maiestatis Personae Pharmacopoei, et ALBERTI SEBAE, Pharmacopoei apud Amstelodamenses famigeratissimi, amicitiam mihi semper gratissimam utilissimamque. Quod denique medico peregrinationes utilitatem afferant, id sane docent sapientissimae PERILLVSTR. REIPVBL. NORIMBERGENSIS leges, secundum quas, laudabilissimo instituto, ad inclutum, quod Norimbergae floret, MEDICORVM COLLEGIVM, nemini facile conceditur aditus, nisi qui, Laribus patriis relictis, ad amplificandum Machaonis studium, alias etiam regiones extra Germaniae limites, perlustrauit. Immo PETRVS CASTELLVS: (1) *ut ultimum*, inquit, *perfectionis gradum assequatur Medicus, in diuersas regiones peregrinari debet. Nihil igitur faciendi sunt ii, qui domo nunquam exierunt, plurimi autem, qui multas regiones perscrutati sunt, uariarumque Nationum dogmata, mores, instituta, morbos, et remedia considerarunt, didicerunt, aestimandi sunt.* Omnia autem, quae hactenus disserui, non obstant, quo minus tamen SENECAE sententia certissima nitatur ueritate. Absit enim, SENECAM docuisse, medico haud prodesse peregrinationes; quas potius in hac *epistola* ipse commendat: nec de Philosopho tam sapiente uix cogitari potest, eum id contemnere posse, quod euidentissimum exerit usum. Non enim SENECA simpliciter dixit, peregrinationem nihil conferre ad culturam artis salutaris, sed tantummodo eam non *per se facere medicum*. *Quid*, inquit, *per se prodesse peregrinatio* cui-

(1) Tr. de Optim. medic. Praefat.

cuquam potuit? Non uoluptates illa refrenauit, non iras repressit. etc. *Quamdiu quidem nescieris, quid fugiendum, quid petendum, quid necessarium, quid superuacuum, quid iustum, quid honestum sit; non erit hoc peregrinari, sed errare. Nullam ibi opem feret iste discursus.* Loquitur adeo SENECA, de eorum peregrinatione, qui nullis prorsus scientiae. et uirtutis praesidiis, nullisque consiliis, instructi; sed tandum ex consuetudine, et exemplo aliorum, aut inconsulto animi impetu, in terras peregrinas abeunt. Quis enim nescit, non ab omnibus ita, ut fieri debeat, itinera institui; sed aliquando magis ex curiositate, quam utilitatis studio, suscipi. Quo merito referenda est ἀποδημιονία, quem morbum QUIDO PATINVS, (m) nescio quo iure Germanis esse proprium perhibet. Qui parum curant, ut studia artis salutaris amplificare uelint, modo reuersi possint enarrare, quam splendida uiderint Palatia; in quibus hospitiiis optimus uictus; et ubi uaria oblectationum inueniantur genera. De huius generis peregrinantibus merito ualet sententia SENECAE; qui simul et id innuit, *non solam peregrinationem facere medicum.* Nam, secundum HIPPOCRATEM, l. c. non solum locus aptus; sed etiam *doctrina et institutio a puero*, requiritur. Immo, nisi medicinae cultoriam, in arte sua, bona posuerit fundamenta, uix tantam ex itineribus capiet utilitatem, quantam expectare poterat, si iam non nullos fecerit in hac arte profectus.

---

(m) Lettre XLVI.

## IV.

SENECA, *Lib. VII, de benefic. cap. 13.*

Si omnia fecit, ut sanaret, peregit  
medicus partes suas.

**A**D antiquissima si excurrimus tempora, nunquam non fuisse comperimus hominum quoddam genus, quod nescio, qua petulantia, aut impudentia, impulsus, honestissimam artem, maximeque mortalibus salutarem, Medicinam nempe, eiusque cultores, perstringere, variisque contumeliis afficere, studuit. PLATONEM iam et PLINIUM huc pertinere, GEORG. KIRSTENIUS, (n) in peculiari oratione, in eiusmodi contemptores dicta, ostendit. Quid dicam de tot aliis, qui recentiore aetate in medicinam, medicosque, temere inuehi ausi sunt. Quis enim est, qui ignoret, petulantem linguam, calumumque, illius omnium professionum Momî, CORNELII nimirum AGRIPPÆ, et famosissimi Gallorum Comici, MOLIERE? ut raceam multo plures, qui ad hanc classem sunt referendi: quibus uero identidem praestantissimi uiri se fortiter opposuerunt. Et sane uix tam arroganter redarguit artem medicam FERDINANDVS NONIUS, Hispanus; quam grauitè prudenterque ei respondit RODERICVS A CASTRO, Lusitanus, actandem Medicus Hamburgensis. (o) Neque uero alia ex causa istiusmodi homines ad perstringendam medicinam aggressi sunt; quam quod uel non intellexerunt, uel intelligere noluerunt, quid medicus efficere possit, et in quo eius consistat officium. Non pauci enim sibi persuasum habuerunt, eum haud esse uerum medicum, qui non omnibus morbo laborantibus amissam restituere ualeat.

(n) GOTTL. STOLL *Anleit. zur Histor. der Medicin. Gelahr. cap. 1. §. 5.*

(o) *Anonym. Medic. afflic. cap. 1.*



leat sanitatem: qui illud OVIDII, (p) minus ad animum reuocarunt:

*Non est in medico, semper releuetur ut aeger,  
Interdum docta plus ualeat arte malum.*

SENECA uero noster meliori iudicio hac in re usus, egregie monstrauit, in quo potissimum medici officium consistat. Nimirum ut *omnia tantum faciat, ad sanitatem amissam instaurandam, quamuis finem suum non semper assequatur*. Potius alibi: (q) *non ideo*, inquit, *nihil sanat medicina, quia non omnia*. Idem quoque perhibet summus Romanorum Orator et Philosophus CICERO: (r) *aegri*, inquit, *quia non omnes conualescunt, non idcirco nulla est medicina?* Fieri enim nullo modo potest, ut omnes restituantur aegrotantes. Praeualet enim non raro medicaminibus morbus. Quod si igitur in alicuius morbi sanatione medicus omnes intendit uires neruosque, ut secundum artis praecepta aegrotanti subueniat, tunc *peregit partes suas*. Id quod fit, si quando medicus ex certis signis diagnosticis, aliisque indiciis, cognitum sibi reddat morbum; deinde causas tam procatacticas et antecedentes, quam proximam diligenter exploret; tunc secundum eas, prudentes aptasque sibi formet indicationes; denique tuta et idonea afferat indicata, ex chirurgico, pharmaceutico, et diaetetico fonte. Interea quoque signorum prognosticorum, symptomatumque rationem habeat, et, quantum fieri potest, *cito, caute, atque iucunde*, curet. Haec sunt, quae ad uerum medicum pertinent. Quod si uero, his omnibus adhibitis medendi rationibus, tamen aeger moriatur; non medico, sed morbo graui et insanabili, culpa est adscribenda. Quod HIPPOCRATES (s) iam agnouit.

C

In

(p) Lib. I. de Ponto, Eleg. 3. (q) Epist. XCV, ad Lucil. (r) Lib. II. de natur. Deor. (s) Lib. de Arte.

*In singulis, inquit, si res medico non succedat pro animi sententia, in morbi uehementiam, non in artem ipsam, culpa reuicenda est. Et alio loco: (t) Quodsi, cum probe curet medicus, morbi magnitudine superetur aeger, haec medici culpa non est. Si uero, cum recte non curet, neque morbum cognoscat, a morbo superetur aeger; medici culpa est. Cui etiam inter recentiores accedit summus fere in praeterito seculo Germaniae Medicus, DAN. SENNERTVS, (u) utpote qui, iisdem quasi, quibus SENECA, usus uerbis, eandem sententiam confirmat: quod si uehementia morbi, inquit, aeger occubuerit, medicus nihilominus, et suum officium, et quod artis est, fecit. Ex his satis clare apparet, medicum, etiam si interdum moriatur aeger, tamen esse posse inculpatum. (x) Omnino autem hic de uero et in arte uersato medico sermo est, qualem etiam PETR. CASTELLVS (y) depinxit. Obsignamus itaque hanc thesin piis hisce ELIAE RVDOLPH. CAMERARII, uerbis: (z) Non ad euitandam mortem data est ars medica; Dei benedicens dextra requiritur ad ea, quae Medicus tanquam minister suadet. Hanc saepe Deus subtrahit, uel ob Medicum, uel ob aegrum, uel ob utrumque; uel ob alios. In tali tamen casu, ceu in omni aduersitate, quo diutius perdurat, christianus, precibus ad beneficium Numen deuotis, magis magisque continuare debet: ita remediorum usu pergitur, iteratis simul ad summum Archiatrum pro felici euentu precibus; ipsius benignissimae uoluntati committitur, resignatur effectus et euentus.*

(t) Lib. de Affect. (u) Institut. medicin. Lib. V. P. II. cap. 4. (x) ANDR. RIVINI Dissertat. medicar. I. de Medico inculpato. (y) in Traët. Optim. Medic. §. 9. p. m. 43. (z) uidi eius Dissertat. In qua obex curation. morbor. Respond. IOH. GEORG. GLOCKEN, Tubing. 1691.

**D**Vm, ZELTNERE, cupis cultae dare pignora  
mentis,

Defendis SENECAM: dignus honore  
labor!

*Pereximio et Doctissimo*

DOMINO RESPONENTI,  
*de edito eruditionis specimine lubens  
meritoque gratulatur*

PRAESES.

**C**Onscendit doctus cathedram ZELTNERVS Hygeae;  
Hinc uoueo atque precor: Hoc bene cedat  
opus!

Ita Praenobilissimo nec non Doctissimo  
DOMINO ZELTNERO

ex sincero cordis affectu applaudere uoluit

I. F. FLEISCHMANNVS,  
Altorf. Med. Stud. Opp.

**F**ert, ZELTNERE, tibi laudem, coluisse  
Camenas:

Quod quis, quaeso, neget, teste tuo  
Seneca?

*Haec paucula,*

*animo tamen sincero,*

*Conterraneo et amico suo fraterne dilecto  
adiicere uoluit*

ANDREAS IACOBVS KIRSTEN,  
Altdorf. Med. Stud. Opp.

*Felix*

**F***elix connubium Meditrinae almaeque Minervae*  
*In SENECA Medico, ZELTNER amandè, doces.*  
*Ast simul ostendis, valeas quid in arte medendi,*  
*Impiger atque TVVS praestet, AMICE, labor.*  
*Laudo bonos ausus: Numen TVA coepta secundet,*  
*Quo studiis detur laeta corona TVIS.*

Praenobilissimo atque Eruditissimo  
 DN. RESPONDENTI, Amico  
 suo aestumatissimo de hoc edito  
 eruditionis Specimine ex animo  
 gratulatur

**GEORGIUS FERDINANDVS MVLLER,**  
 Med: et Philos. Cultor. Altdorf.  
 Opponens.

